

Biografia di Chani Wever

ORANJESTAD (AAN): Como cu den e fin di siman aki ta bay honra Chani Wever q.e.p.d., aki DIARIO ta reproducir un Biografia di Luciano (Chani) Wever

26/11/1910 – 14/07/1991

Sr. Luciano Wever, miho conoci como Chani, Pai of Mo-Chani, a nace dia 26 di november 1910 for di matrimonio di Luciano Martinez Wever y Epifania Maduro y tabata e di 5 den un famia di 11 yiu.

Na un edad joven di mas o menos 15 aña Chani a bay traha cu e compania petrolera di e tempo ey, esta Lago Oil & Transport Co. Ltd, un subsidiario di ESSO (Standard Oil of New Jersey), unda el a labora durante mas o menos 40 aña, y unda tambe e tabata representante di empleadonan

den e Lago Employee's Council (L.E.C.).

Chani a casa cu Epifania Augustina Schwengle (Fanny) dia 28 di november 1935, for di cual matrimonio a nace 11 yiu, di cual lamentablemente e mayor, un princesa, Epifania Regina, a fayece na edad di 7 luna.

Siete aña despues cu su casa Fanny a fayece, Chani a contrae matrimonio cu Celestina Almary dia 28 di november 1968.

Chani a bay laga e mundo aki riba dia 14 di juli 1991.

Chani den su bida, fuera di a percura pa tur su yiunan haya un educacion Cristian y ehemplar, ademas tabatin e suerte di por a yuda desinterresadamente tambe

centenares di ciudadanonan kende por a hayanan mes den situacionnan dificil riba tereno financiero y social.

Chani tabata berdaderamente un persona cu nunca a laga su man robez sa locual su man drechi a haci.

Mas o menos 50 aña pasa, Chani, hunto cu e "bouwpastoor", esta pastor Paulus D. Grove (di feliz memoria), tabata un di e motornan principal pa na aña 1955 lanta parokia di Brazil, cu a bira Parokia Cristo Rey. E parokia Cristo Rey pues e aña aki ta cumpli 50 aña di existencia.

Cu su trabao den esaki no a worde lubida, ta worde ilustra door di un suceso algun aña pasa tempo cu parokianonan

tabata bende rifa pa drecha misa Cristo Rey. Un di e bendedornan a bende un cierto cantidad di rifa cu un yiu di Chani y na final el a bisa e yiu:

"masha danki, nos ta sigui cu e trabao cu bo tata a cumenza".

Pues un elogio y reconocimiento postumo pa un bon trabao.

Chani, fuera di tabata un di e prome colectantnan na misa di Brazil, tabata tambe esun cu a tuma iniciativa pa bini cu un Consejo Parokial, den cual e tabata miembro y presidente (banda di pastor); Chani tambe tabata parti Santa Comunión den bario na esnan cu sea pa enfermedad of pa algun otro motibo no por a asisti na santo sacrificio di misa.

Un di e muestranan di su actividadnan social y amor pa su prohimo, tabata su bishitanan casi diario na enfermonan den hospital, hopi biaha desconoci p'e, unda semper e tabatin un palabra di apoyo spiritual y moral, di forza y consuelo pa e enfermonan.

E unico biaha cu Chani a bishita hospital pa su mes, tabata tambe su ultimo y alavez su partida for di e mundo aki.

Chani tabata co-fundador di Credit Union di Brazil cu el a dirigi tambe pa mas o menos 30 aña te na su morto.

Bao di su maneho Credit Union Cristo Rey por a yuda mas ciudadano den necesidad financiero, y e Credit Union aki tabata un di e poconan cu a keda existi pa sigui cumpli cu su meta.

Tabata atrobe riba su iniciativa cu Centro di Bario Brazil a weita luz di dia; pa motibo di tur su otro responsabilidnan

Chani mester a laga e presidencia di Centro di Bario Brazil den man di otro, y preferiblemente den man di e jovennan di e bario.

Pa tur su contribucionnan na bienestar di Parokia di Brazil, Papa Juan Pablo II den un decreto cu fecha 16 di october 1990 duna na Basilica San Pedro na Roma, a condecora Chani como

"Cabayero di e Orden di Papa San Silvestre".

Na ocasion di entrega di e reconocimiento door di defunto Monseigneur Ellis, Chani a remarca algo cu ta tipifica su persona:

"Mi no ta compronde pakico mi mester ricibi e homenahe aki, pasobra simplemente locual mi a haci, ta loke ta mi deber como ser humano y como parti di e comunidad aki. Nunca mi a haci algo pa mi prohimo cu e pensamiento di haya algo back".

Riba tereno deportivo Chani a presta su apoyo, entre otro patrocinando un team di baseball di e tempo ey "El Capitan", locual tambe a haya atencion den e buki di baseball skirbi pa sr. Clyde Harms, "Historia di Baseball di Aruba"- 2002.

E mayor serie di muestra di su amor pa deporte tabata tempo cu, despues cu e prome team di football di Brazil, esta "Jong Brazil", a stop di existi, Chani hunto cu otro nan na cas di sr. Cornes Noguera (di feliz memoria) a dicidi di lanta un team nobo di football, pero awor bao number di "Brazil Jrs". E team aki durante algun tempo tabata practica y hunga weganan regular di competitie riba un tereno na Mabon, cortesia di famia Thijzen di e bario.

Desde e fecha 1 di mei 1959 Chani - gratuitamente - a pone na disposicion di Brazil Jrs un pida tereno na Rooi Master unda te awe deporte di football y baseball ta worde practica, y cu awe cu tur orguyo ta carga e number

"Centro Deportivo Luciano Wever".

Yiunan di Chani ta continua cu e tradicion y ta laga e tereno na disposicion gratuito di deporte.

Tambe riba tereno politico Chani tabata activo; entre otro e tabata co-fundador di e partido U.N.A. (Union Nacional Arubano, funda dia 17 di october 1948), y despues a funda su mes partido F.O.A. (Frente Obrero Arubano, 4 september 1961), cu lamentablemente a participa un biaha so den eleccion.

Luciano – Chani – Wever, un persona cu a laga su marca atras!!